



Reglur um skóla-/frístundaakstur í Vopnafjarðarhreppi

Sveitarfélag / skóli

- Skóla-/frístundaakstur er skipulagður miðað við þarfir grunnskóladeildar Vopnafjarðarskóla. Heimilt er þó að flytja leikskólabörn með skólabílum ef pláss er í bílnum enda lengist dagleg akstursleið skólabíls ekki. Leikskólabörn skulu hafa náð þriggja ára aldri til að geta nýtt akstur með skólabíl. Elsti árgangur leikskólabarna hefur ávallt forgang ef framboð sæta í skólabílnum er takmarkað. Að öðru leyti gildir aldursröð barnanna, þau eldri hafa forgang fram yfir þau yngri.
- Daglegur akstur er samkvæmt skólaakstursáætlun sem skólastjóri Vopnafjarðarskóla vinnur fyrir hvert skólaár í samræmi við kennsluskipan. Fjöldi barna getur verið breytilegur á milli ára. Skipulagi aksturs verður að öllu jöfnu ekki breytt innan skólaárs nema til komi fjölgun/fækkun grunnskólabarna sem nýta skólaakstur.
- Að morgni er það starfsmaður grunnskóla sem tekur á móti börnunum við skólabílinn og fylgir þeim inn á leikskólann.
- Skólastjóri Vopnafjarðarskóla metur ásamt bílstjóra og foreldrum hvort þörf sé á gæslumanni í skólabifreið með hliðsjón af öryggi, fjölda, aldri nemenda og samsetningu nemendahópsins sem ferðast með bifreiðinni, vegalengd og öðrum aðstæðum.

Farþegar / foreldrar

- Skólareglur, skv. 30. gr. laga nr. 91/2008 um grunnskóla, eiga við um framkomu og háttsemi nemenda í skólaakstri. Fara skal með brot á skólareglum skv. 14. gr. sömu laga.
- Nemendur skuli vera tilbúnir til að fara upp í skólabílinn þegar hann kemur í hlað á morgnana og þegar að heimferð er komið.
- Foreldrar leikskólabarna þurfa að sækja um pláss í skólabíl í síðasta lagi 15. desember.
- Foreldrar leikskólabarna (þar sem ekki eru einnig grunnskólabörn) skulu koma börnum sínum að akstursleið skólabíls. Hafa skal samráð við bílstjóra um stoppistöð bíls. Foreldrar barna bera ábyrgð á að útvega viðurkennda barnabílstóla fyrir sitt barn, sem einungis verður notaður af því.
- Forðast skal að trufla bílstjórann á meðan á akstri stendur, nema nauðsyn beri til.
- Ganga skal vel um bílinn og allt sem í honum er. Farþegar eiga að taka allar eigur sínar út úr bílnum eftir hverja ferð og henda rusli sem til fellur.
- Neysla sælgætis, gosdrykkja, tóbaks og áfengis er óheimil í skólabílnum.
- Sýna ber samferðarfólki kurteisi og tillitssemi í skólabílnum.
- Ef foreldrar hafa áhuga á að senda barn sitt sem "gest" með skólabíl skal ræða þá fyrirætlan við bílstjóra og fá samþykki hans fyrir aukafarþega með góðum fyrirvara.
- Starfsmenn Vopnafjarðarskóla geta nýtt sér ferðir skólabíls að fengnu samþykki bílstjóra.
- Bílstjórar eru ekki skyldugir til að taka aukafarangur svo sem hjól nemenda með í skólabílinn.

- Þegar skólabíll er notaður til að keyra nemendur á viðburði á vegum skólans (s.s. fjarðaball) gilda sömu reglur og almennt í skóla- og frístundaakstri.

Bílstjórar / verktakar

- Bílstjóri skólabifreiðar skal hafa aukin ökuréttindi og hafa sótt skyndihjálparnámskeið og önnur þau námskeið sem sérstaklega eru ætluð bifreiðastjórum fólksflutningabíla.
- Við undirritun samnings um skóla og frístundaakstur skal verktaki tilgreina alla þá sem koma til með að sinna akstri fyrir hans hönd og leggja fram staðfestingu á að þeir uppfylli þær kröfur sem til starfsins eru gerðar. Ekki er heimilt að skipta um bílstjóra skólabíls nema skólastjóri sé upplýstur um það með hæfilegum fyrirvara. Gert er ráð fyrir að verktaki sé að öllu jöfnu bílstjóri en þó er heimilt að semja um annað.
- Óheimilt er að ráða bílstjóra til skólaaksturs eða gæslumann, sbr. 3. mgr. 5. gr., sem hlotið hefur refsidóm fyrir brot á ákvæðum XXII. kafla almennra hegningarlaga. Við afgreiðslu umsóknar um starf bílstjóra eða gerð ráðningarsamnings skal liggja fyrir sakavottorð eða heimild skólastjóra, eða þegar svo ber undir, sveitarstjórnar til þess að afla upplýsinga úr sakaskrá, sbr. 3. mgr. 11. gr. laga nr. 91/2008 um grunnskóla.
- Ákvæði um þagnarskyldu starfsfólks skóla og tilkynningarskyldu til barnaverndaryfirvalda taka til bílstjóra skólabifreiðar þó að hann sé ekki starfsmaður sveitarfélags. Í samningi sveitarfélags um skólaakstur á þess vegum skal kveðið sérstaklega á um hæfi og skyldur bílstjóra.
- Bílstjórar / verktakar skulu sýna trúnað um öll mál er þeir kunna að fá vitneskju um í starfi sínu og snerta einstaka nemendur, foreldra þeirra eða aðstandendur.

- Bílstjóri heldur uppi aga í skólabíl og gætir þess að skólareglum Vopnafjarðarskóla sé fylgt í bílnum.
- Stríðni og einelti er aldrei liðið í skólabílnum. Komi upp vandamál í skólabíl svo sem vanlíðan, einelti eða stríðni, eða verði bílstjóri var við að eitthvert barnanna eigi í erfiðleikum ber honum að ræða það við skólastjóra.
- Bílstjóri sér um að stólar séu rétt festir og börn setji á sig öryggisbelti. Ekki skal leggja af stað fyrr en öll öryggisatriði hafa verið uppfyllt.
- Bílstjóra ber að sýna sérstaka aðgát áður en nemendum er hleypt út úr skólabifreið.
- Verktaki skal sjá til þess að bifreið sú sem notuð er til skólaakstursins uppfylli öll ákvæði laga, reglugerða og settra reglna um gerð, búnað og merkingu sem í gildi eru á hverjum tíma. Kostnað við breytingar sem upp kunna að koma vegna breyttra laga, reglugerða og settra reglna um gerð og búnað hennar, skal eigandi bera sjálfur. Allar bifreiðar sem notaðar eru til að aka nemendum á vegum skólans verða að hafa öryggisbelti í öllum sætum. Bifreiðar sem notaðar eru til aksturs á skólabörnum skulu vera snyrtilegar, loftgóðar og reyklaugar.
- Bílstjóri leggur mat á hvort aðstæður séu með þeim hætti, t.d. vegna veðráttu eða ófærðar, að breyta þurfi út frá fyrirbyggjandi áætlun um daglegan skólaakstur. Tilkynna ber skólastjóra um slíkar breytingar án tafar. Skólastjóri getur eftir atvikum óskað eftir að skólaakstri sé flýtt eða seinkað vegna veðuraðstæðna.
- Komu- og brottferðatímar eiga að vera ákveðnir og stundvísi mikilvæg. Bílstjóri skal haga akstri þannig að nemendur komi á tilsettum tíma í skólann, ekki of seint og ekki heldur of snemma til að forðast aukinn biðtíma. Bílstjórar skulu að jafnaði ekki sinna einkaerindum meðan börnin eru í bílnum né láta slík erindi seinka ferðum.

- Skólabílar eiga fasta biðstöð á skólalóð og þar er bannað að bakka. Bílstjórar skila leikskólabörnum í umsjá starfsmanns grunnskóla eftir að hafa skilað grunnskólabörnum.
- Verði slys skal skólabílstjóri strax hafa samband við lækni, lögreglu og skólastjóra Vopnafjarðarskóla. Í vondu veðri má bílstjóri ekki sleppa nemendum úr augsýn.
- Bílstjóri gætir þess eftir mætti að hafa opinn farsíma yfir daginn ef breyta þarf áætlun.
- Í skólabíl skal vera tafla yfir ferðir skólabíls og hvaða börn nýta hvaða ferðir. Afrit af þessari skráningu skal fylgja reikningi sem verktaki gefur út mánaðarlega.
- Í skólabíl skal vera símaskrá með símanúmerum foreldra/forráðamanna allra barna sem nýta sér ferðir með skólabílnum.

Samþykkt í hreppsráði þann 3. desember 2020.

Leikskólaakstur í reglum þessum er samþykktur sem tilraunaverkefni frá 15. janúar 2021 og út skólaárið 2020-2021.

Að vori 2021 verður verkefnið metið í samráði við þá aðila sem að því koma og framhald skólaaksturs leikskólabarna ákveðið með tilliti til þess.